

懺悔 勸請 隨喜 迴向 發願文

懺悔 勸請 隨喜 迴向 發願文（三拜）

至心懺悔 弟子 稱自己名等 與一切法界眾生。從無始來 眼根
因緣 貪著諸色。耳根因緣 隨逐外聲。鼻根因緣 聞諸香氣。舌根
因緣 貪著美味。身根因緣 貪著諸觸。意根因緣 貪著諸法。狂愚
不了 隨所緣境 起貪嗔癡。如是邪念 能生一切雜業。所謂十惡五
逆 猶如猿猴 亦如麤膠 處處貪著 遍至一切六情根中。此六根業
枝條華葉 悉滿三界 二十五有 一切生處 亦能增長 無明老死
十二苦事。八邪八難 無不經歷。無量無邊 惡不善報 從六根生。
如是六根 即是一切生死根本 眾苦之源。十方諸佛 常在不滅 我
濁惡眼 障故不見。十方諸佛 常在說法 我濁惡耳 障故不聞。
十方諸佛 功德妙香 充滿法界 我濁惡鼻 障故不聞。諸佛法味
彌滿法界 舌根罪故 不能別了。十方諸佛 常放淨光 照觸我等
身根重罪 障故不覺。一切諸法 悉是佛法 妄想分別 受諸熱惱。
是則於菩提中 見不清淨 於解脫中 而起纏縛。今始覺悟 生重慚
愧 生重怖畏。誦持大乘 如說修行 歸向普賢菩薩 及一切世尊。
燒香散華 說六根罪 發露懺悔 不敢覆藏。以是因緣 令我與法界
眾生 六根所起一切惡業 已起今起 未來應起。洗滌懺悔 畢竟清
淨 勸請諸佛 久住說法 隨喜凡聖。所有功德 迴向眾善 同趣菩
提。盡此報身 得生安養。一切行願 速得圓滿

懺悔 勸請 隨喜 迴向 發願已。歸命禮三寶（三拜）